

DINS LÈS BWÈS.

I lî avéve passé s'brès autou d'sès spales èt l' atirer viè lès bouchnisses. Èle ni s'a nén djoké d' rîre èt répèter :

- Cite Cougnole, don !

Sès nièrs si rapaujant, èle s'a mètu à rapinser k' èle avéve volu ièsse boune. On n'a nén idêye, savoz; lès viyès djins sont si drole; ça z-a tévozé dès droles d' idêyes !

Èle s' rimètu à lî djôzer do tîmps kand s' mame vikéve co èt ki l' Cougnole vinéve à l' cinse. On l' ukéve kand li vatche èstéve po vèler. C'èst k'èle lès conèchéve bèn,

lêye, lès bièsses. Atanawète, èle sognéve ètou lès djins èt riwêfî auzès malâdes. Tinoz, l' dêrin gamén di s' moman, c'èst minme lèye k' avéve vinu po li mète au monde. Riplonkêye dins s' passé, èle si rivoyéve tote djonète, mêrseûle dins l' maujone do waurdeû d'tchêsse Maucord; èle î avéve crèchu dins one frède ombre; èle n'î avéve mauy sitî bèn eûreûse. A z-î sondjî, èle ni l' èstéve nén d'pus au djoû d' audjourdu. Èle n'avéve nén tot lès cayèts ki lî aréve falu; tote djonne èle aréve polu s' marier. Èt èle s'a mètu à lomer sakants galants k' avîne dimandé l'intrêye èt polu vinu à l' chîje. "Non.na !" k'èle avéve todî rêspondu.

- Come on pout ièsse bièsse ! Èle s' atindrichéve. Emociôné, il l'a bèn sèré conte li èt lî dîre : - C'èst l' vrai ? V'n'èstoz-don nén eûreûse ?

Èle a lévé sès ouy èt, tot soriant, i s'sont riloukîs. Il l'a rabrèssî. Èle s'a lèyî fé. L' pîsinte s' faufiléve dins on èburtakâdje di vèrdeus. I r'poûsséve lès coches à fait . Kand i z-èstîne oûte, èles si rclapîne avou on brût d' swèle èt tévozé lzeu flayî l' dos. Dès fistus s' ècomèlîne dins lès tchvias d' Djèrminne èt pa côps lî agritchî s' cote. I z' avancîne dins l'sinteû dès frèchès tères, s' bagnant dins l' flawe vèrdeu dès fouyes. Dès bokèts d' cîr, intes lès âbes, richènîne à

dès riglatichants bleûs traus. (...) Po l' prumî côp l' natûre lî a chéné boune èt grand l' Bon Dié : foû di s' keûr on cri lî a vnu réche di sès lèbes : - Ki c'èst doû d' viker ! L' coron dèl pîsinte divnéve pus laudje. (...)

Èle s'a achîd dsos on èsse. I s'a couchî adlé lêye, s' tièsse dins sès pougnes, èt l' bèn riwêfî. Èle lî a stichî sès dwèts dins sès tchvias. " On diréve dèl swèle." – M' pia ètou, lî a-t-i rêspondu.

Il a rmonté l' mantche di s'tchimîsse èt l' oblidjî à fé rider s' dwèt dsus s' pia, si bèn tote lisse. Adon, i lî a moustré sès gros muskes èt lès fé roler come dès boles. Ènondé, i lî cauzé di s'fwace. On spès sto, covièt d' tère, èstéve tot près. D'on laudje côp d' rin, il l' a ritoûrné. Il lî a djôzé di s' vivacité èt, pou lî bèn moustrer a gripé come on spirou dins lès coches d'on aube. Il a fait chénance di s'bate, li fiant voye comint d'on côp i poléve fé voler dij omes à l' tère. I tapéve è l' èr sès pîds, sès mwins èt s' tièsse. Tot s' vantant avou plèji, di s'si grande fwace.

Èsbaubiye, èle l' admiréve. Èle li sintéve tot pwissant èt s' dîre ki, tot conté, tot rabatu, c' èstéve bèn là l'ome k'i lî faléve.

Adon, lès aûbes ont vèyu ène sauvadjerîye. I s' a dauré dsus lêye, lès brès grands douvièts, tèribe. On èwaremint nawiyéve dins sès ouy, s' botche avéve sipèchi èt sès narènes gonfler èt tryaner.

Èle l'a sintu ariver dsus lêye pus rade k' èle ni l'a vèyu èt s'mète à bwêrler, a mitan ridrèssîye. Trop taurd, dèdja il l'strwètmint rèsèréve dins on fèl rabrèssâdje.

Autoû d' zèls, lès fouyes dès bwès tchafiyîne tot doûcemint èt lès bêrcî.

(A l' après d' Camile Limonî : *On Maûle*)



A môde di rén, on comache dispû d'pus d' 406 pâdjes ! Faléve-t-i l' fé ?